

Rhaglen Thrawsnewid Gwasanaethau Plant – Cylchlythyr Newyddion

Medi 2023



**Julie Morgan AS,
Y Dirprwy Weinidog Gwasanaethau Cymdeithasol**

Cyflwyniad

Mae'n bleser gennyf gyflwyno ein cylchlythyr newyddion cyntaf yn ymwneud â Thrawsnewid Gwasanaethau Plant. Mae llawer o waith cydgynhyrchiol eisoes yn cael ei wneud i sbarduno newid yng Nghymru ac rydym yn awyddus i rannu hyn gyda chi.

Mae gweledigaeth Llywodraeth Cymru ar gyfer gwasanaethau plant yng Nghymru yn glir - rydym am i fwy o blant gael cymorth i aros gyda'u teuluoedd a lleihau nifer y plant a phobl ifanc sy'n cael eu derbyn i ofal. Rydym am sicrhau bod pobl ifanc yn aros mewn gofal am gyn lleied o amser â phosibl, yn unol ag anghenion y person ifanc. Tra bod plant mewn gofal, rydym am iddynt aros yn agos at eu cartrefi er mwyn parhau i fod yn rhan o'u cymuned - rhwydwaith y plentyn.

Mae ein Rhaglen Lywodraethu'n cynnwys 8 ymrwymiad sy'n darparu'r fframwaith i wneud hyn. Bydd cyflawni'r ymrwymadau hyn yn arwain at newid ledled y system gyfan yng Nghymru ac yn cyd-fynd â'r nodau a'r amcanion yn ein [Cynllun Plant a Phobl Ifanc](#). Bydd yr ymrwymadau hyn a'r Cynllun yn cael eu cyflawni dros dymor cyfan y Senedd hon.

Ymrwymadau'r Rhaglen Lywodraethu ar gyfer Gwasanaethau Plant:

1. Ystyried cyfleoedd radical i ddiwygio'r gwasanaethau presennol ar gyfer plant sy'n derbyn gofal ac yn gadael gofal.
2. Dileu elw preifat o ofal plant sy'n derbyn gofal yn ystod tymor nesaf y Senedd.
3. Ariannu gwasanaethau preswyl rhanbarthol i blant ag anghenion cymhleth, gan sicrhau bod eu hanghenion yn cael eu diwallu mor agos at eu cartrefi â phosibl ac yng Nghymru lle bynnag y bo hynny'n ymarferol.
4. Cryfhau cyrff cyhoeddus yn eu rôl fel 'rhiant corfforaethol'.
5. Atal teuluoedd rhag chwalu drwy ariannu gwasanaethau eirioli i rieni y mae eu plant mewn perygl o ddod yn rhan o'r system ofal.
6. Darparu cymorth arbenigol ychwanegol i blant ag anghenion cymhleth a allai fod ar gyrion y system ofal.
7. Parhau i gefnogi a chynnal hawliau plant a phobl ifanc ar eu pennau eu hunain sy'n ceisio lloches.
8. Cefnogi ein cynllun cenedlaethol Maethu Cymru.

Rydym yn gwybod y bydd angen amser i gyflwyno'r newidiadau sydd eu hangen i wireddu ein gweledigaeth ac na fydd modd ei gwireddu dros nos, ond rydym yn gwybod bod pethau'n gallu newid yn gyflym pan fydd pawb yn cydweithio. Er enghraifft, gallwn ddysgu o enghreifftiau da o wasanaethau sydd eisoes yn cael eu darparu ar gyfer plant a phobl ifanc sydd â phrofiad o fod mewn gofal yng Nghymru. Felly, rydym wedi sefydlu Rhaglen Drawsnewid sy'n seiliedig ar dair elfen allweddol - diwygio radical, darparu gwasanaethau yn y dyfodol, a chydweithio rhwng y system gyfan. Mae llais plant a phobl ifanc sydd â phrofiad o fod mewn gofal wrth wraidd y rhaglen.

Mae'r bwletin hwn yn cyflwyno ein cynllun ar gyfer y Rhaglen Drawsnewid a'r strwythur llywodraethu rydym wedi'i sefydlu i helpu i'w chyflawni. Hefyd, mae'r bwletin yn cynnwys y wybodaeth ddiweddaraf am y gwaith rydym wedi'i wneud a'r hyn sy'n digwydd nesaf.

Llais Person Ifanc â Phrofiad o fod mewn Gofal

“Roeddem yn falch o siarad yng nghyfarfod diwethaf y Grŵp Cyflawni Trawsnewid am y cyfarfod Uwchgynhadledd rhwng Gweinidogion a Llysgenhadon Ifanc â phrofiad o fod mewn gofal, a'r [datganiad](#) y gwnaethom gytuno arno.


Mae'r Weledigaeth yn y Datganiad yn uchelgeisiol iawn, ac rydym yn gwybod na all popeth newid dros nos. Ond pan fydd y Gweinidogion a'r Llysgenhadon Ifanc yn cwrdd eto'r flwyddyn nesaf, rydym yn disgwyl deall yn glir sut mae'r Weledigaeth yn cael ei rhoi ar waith. Dyna pam mae gwaith y Grŵp Cyflawni Trawsnewid mor bwysig, a pham rydym yn credu ei bod yn bwysig ein bod ni'n rhan ohono.”

*Hope Hover a Rhian Thomas
Llysgenhadon Voices From Care Cymru*

Cynllun Ein Rhaglen Drawsnewid

Er mwyn cefnogi a chyflwyno ein Rhaglen Drawsnewid, mae gennym gyllideb rhaglen o tua £70m o 2022/2025 er mwyn sbarduno ein cynlluniau, a amlinellir yn y map ffordd isod:

Improving Outcomes for Children – Transformation Road Map



Mae enghreifftiau o'r gwaith sydd wedi'i wneud yn 2022/2023 yn cynnwys datblygu Fframwaith Ymarfer Cenedlaethol (darllenwch ymlaen i gael rhagor o wybodaeth am y Fframwaith). Ceir buddsoddiad gwerth £1.6m yn ystod tymor y Senedd hon er mwyn uwchraddio gwasanaethau eiriolaeth rhieni ledled Cymru a gweithio i gryfhau swyddogaeth cyrff cyhoeddus fel rhieni corfforaethol trwy gyhoeddi'r Siarter Rhianta Corfforaethol.


I reoli'r gwaith o gyflwyno'r Rhaglen Drawsnewid, mae Bwrdd Trosolwg Gweinidogol wedi ei sefydlu, a chynhaliodd ei gyfarfod cyntaf ym mis Mai eleni. Mae'r Bwrdd yn cael ei gadeirio ar y cyd gan y Prif Weinidog a'r Dirprwy Weinidog Gwasanaethau Cymdeithasol. Mae Grŵp Cyflawni Trawsnewid wedi'i sefydlu hefyd ac mae'n cynnwys cynrychiolwyr o bob sector sydd â diddordeb mewn gwasanaethau plant, gan gynnwys pobl ifanc â phrofiad o fod mewn gofal eu hunain. Mae'r Grŵp hwn wedi cyfarfod dair gwaith eleni ac mae'n cael ei gadeirio gan Jonathan Griffiths, arweinydd Trawsnewid gwasanaethau cymdeithasol i blant ac oedolion.

Cynnydd hyd yn hyn, cyflawniadau a'r camau nesaf

Mae'r canlynol yn rhoi'r wybodaeth ddiweddaraf am rai o feysydd y rhaglen gan dynnu sylw at rai o'r llwyddiannau yn ogystal â'r cynlluniau ar gyfer y camau nesaf:



Ar 3 Rhagfyr 2022, cynhaliwyd yr Uwchgynhadledd gyntaf ar gyfer Pobl sy'n Gadael Gofal rhwng Gweinidogion Cymru, gan gynnwys y Prif Weinidog a'r Dirprwy Weinidog Gwasanaethau Cymdeithasol a 50 o bobl ifanc â phrofiad o fod mewn gofal neu lysgenhadon. Canlyniad yr uwchgynhadledd yw [datganiad](#) sy'n amlinellu gweledigaeth ar y cyd ar gyfer gwasanaethau plant. Trafodwyd y datganiad hwn gan y bobl ifanc a'r Gweinidogion yn ystod y digwyddiad, ac roedd cyfle i'r bobl ifanc rannu eu profiad bywyd. Llofnodwyd y datganiad gan y Prif Weinidog ar ran Llywodraeth Cymru a gan 4 o'r llysgenhadon ifanc ar 10 Mai eleni.



Ar 29 Mehefin 2023, cyhoeddwyd y [Siarter](#) Rhianta Corfforaethol ar-lein. Mae'r Siarter a ddatblygwyd gan y Grŵp Gweithredu ar Rianta Corfforaethol yn amlinellu cyfres o egwyddorion i'w dilyn gan gyrff y sector cyhoeddus a'r sector preifat wrth ddarparu gwasanaethau i blant a phobl ifanc â phrofiad o fod mewn gofal, er mwyn sicrhau eu bod yn cael yr un cyfleoedd bywyd â phawb arall.

Cynhelir lansiad cyhoeddus ehangach o'r Siarter ym mis Medi.

Fframwaith Ymarfer Cenedlaethol

Mae gwaith yn mynd rhagddo i ddatblygu'r Fframwaith Ymarfer Cenedlaethol. Y Fframwaith fydd y gyfres gyntaf o safonau cenedlaethol ar gyfer gwasanaethau plant yng Nghymru, gan ategu gweithdrefnau Cymru gyfan eraill, fel gweithdrefnau diogelu Cymru Gyfan. Bydd y safonau'n rhai amlasiantaethol oherwydd ein bod yn cydnabod bod plant ag anghenion cymorth ac amddiffyniad angen cymorth yn aml gan nifer o weithwyr proffesiynol sy'n gweithio gyda'i gilydd fel tîm. Rydym yn rhag-weld cyflawni hyd at 5 safon ymarfer newydd erbyn diwedd 2023 a bydd safonau pellach yn cael eu cydgyhyrchu erbyn diwedd 2024.

Dileu elw preifat o ofal plant sy'n derbyn gofal

Rydym wedi sefydlu pedair ffrwd waith newydd o dan Fwrdd y Rhaglen Dileu Elw er mwyn defnyddio amrywiaeth eang o sgiliau a phrofiad i sbarduno cynnydd i sicrhau lleoliadau digonol a datblygu gwytnwch yn y sector, gan gynnwys:

- Ehangu a datblygu darpariaeth awdurdodau lleol / rhanbarthol newydd
- Ehangu a datblygu darpariaeth nid-er-elw newydd
- Pontio'r Sector Annibynnol/Preifat
- Grŵp Trawsnewid Lles Pennaf

Hefyd, mae dau is-grŵp wedi'u sefydlu o dan ffrwd waith 1 yn canolbwyntio ar sefydlogrwydd lleoliadau ac yn ystyried atebion i leihau'r angen am drefniadau Gweithredu heb Gofrestru, ochr yn ochr â materion sy'n gysylltiedig â recriwtio a chadw'r gweithlu gofal preswyl i blant.

Yn ogystal, mae dau is-grŵp wedi'u sefydlu o dan ffrwd waith 3 i ystyried gwerth/asedau sefydliadol a strwythurau/modelau busnes.

Rydym wedi buddsoddi £68m yn ychwanegol yn y sector dros dair blynedd er mwyn cefnogi a sbarduno ein gweledigaeth i ddileu elw preifat o ofal plant sy'n derbyn gofal. Bydd y cyllid hwn yn canolbwyntio ar feysydd fel datblygu darpariaeth gofal preswyl a gofal maeth awdurdodau lleol, symud plant o ofal preswyl yn ôl i leoliad teuluol, a darparu gwasanaethau wedi'u lleoli a'u cynllunio'n lleol, gan gynnwys darpariaeth arbenigol ar gyfer plant ag anghenion mwy cymhleth ac, yn anad dim, gwella canlyniadau i blant.

Lansiwyd yr ymgynghoriad sy'n gysylltiedig â chynigion ar gyfer deddfwriaeth sylfaenol i helpu i 'ddileu elw o ofal plant sy'n derbyn gofal' ar 17 Awst a daeth i ben ar 7 Tachwedd. Cyhoeddwyd y [crynodeb o'r ymatebion](#) ar 22 Mehefin.

Ar 27 Mehefin eleni, cyhoeddodd y Prif Weinidog y bydd Bil Gofal Cymdeithasol yn cael ei gyflwyno yn ystod hanner olaf blwyddyn y Senedd rhwng 23 Medi a 24 Gorffennaf i gefnogi ein hymrwymiad i ddileu elw.



Rydym wedi parhau i fuddsoddi yn ein cynllun maethu cenedlaethol, Maethu Cymru, er mwyn gwella gallu gwasanaethau maethu awdurdodau lleol i recriwtio a chadw gofalwyr maeth. Bydd hyn yn eu helpu i wireddu eu huchelgais ar y cyd i leoli mwy o blant sy'n cael eu maethu mewn lleoliadau awdurdodau lleol, yn ardal eu cartrefi, gan gadw plant yn agos at eu rhwydweithiau a'u cymunedau lle bynnag y bo'n bosibl ac yn briodol.

Gofal gan berthynas (gan gynnwys Gorchmynion Gwarcheidiaeth Arbennig)

Rydym wedi ymrwymo i sicrhau bod gofalwyr maeth sy'n berthnasau yn derbyn yr un cymorth â gofalwyr maeth prif ffrwd, a thrwy Ymrwymiad Cenedlaethol Maethu Cymru rydym yn gweithio tuag at sicrhau bod pecyn hyfforddiant, cymorth a gwobrau ar gael yn gyson i bob gofalwr maeth sy'n berthynas ym mhob un o'r 22 asiantaeth faethu awdurdod lleol yng Nghymru.

Rydym am i Ofalwyr Maeth sy'n Berthnasau dderbyn cymorth ariannol cyfartal â gofalwyr maeth prif ffrwd. Mae ein gwaith presennol ar ffioedd a lwfansau'n canolbwyntio ar sicrhau cymorth ariannol cyson ledled Cymru i bob gofalwr maeth cymeradwy.

Rydym hefyd wedi sefydlu Grŵp Arbenigol Gwarcheidiaeth Arbennig sy'n cynnwys cynrychiolwyr o'r sector statudol a'r trydydd sector ynghyd â defnyddwyr gwasanaeth. Bydd yn ceisio datblygu dull gweithredu gwell a chyson sy'n seiliedig ar anghenion i gefnogi teuluoedd Gwarcheidiaeth Arbennig ledled Cymru.

Mabwysiadu

Mae 'Ymrwymiad Cymorth Mabwysiadu' Cymru yn amlinellu'r cymorth sydd ar gael i bob teulu sy'n mabwysiadu yng Nghymru ym mhob cam o'r broses fabwysiadu. Yr Ymrwymiad yw'r ddogfen gyntaf o'i bath yn y DU, a'i nod yw sicrhau bod teuluoedd sy'n mabwysiadu yng Nghymru yn teimlo'n hyderus bod gwybodaeth a chymorth ar gael pan fydd angen, gan weithwyr proffesiynol sydd â gwybodaeth arbenigol am fabwysiadu ac anghenion gofal plant.

Fel rhan o wasanaeth mabwysiadu modern i Gymru, ochr yn ochr â'r Gwasanaeth Mabwysiadu Cenedlaethol, rydym yn canolbwyntio ar wella cyswllt plant mabwysiedig gyda'u teuluoedd biologol lle mae'n ddiogel ac yn briodol gwneud hynny.


Mae'r Dirprwy Weinidog Gwasanaethau Cymdeithasol wedi cyhoeddi ymddiheuriad ffurfiol ar ran Llywodraeth Cymru am y profiadau a'r effaith gydol oes ar bawb sydd wedi'u heffeithio gan arferion mabwysiadu hanesyddol yng Nghymru. Rydym yn parhau i weithio gyda'r Gwasanaeth Mabwysiadu Cenedlaethol i ystyried y cymorth y gellir ei ddarparu i gefnogi pobl a gafodd eu heffeithio gan arferion o'r fath.

Er bod mabwysiadwyr yn derbyn cymorth drwy gydol y broses fabwysiadu, mae angen cymorth dilynol gan gyflogwyr hefyd er mwyn helpu mabwysiadwyr a'r rhai sy'n aros i blentyn ymuno â'u teulu. Mae Gwasanaeth Mabwysiadu Cenedlaethol Cymru wedi lansio pecyn cymorth newydd i gyflogwyr er mwyn helpu busnesau a sefydliadau i wella eu cefnogaeth i weithwyr sy'n mabwysiadu neu sy'n aros i fabwysiadu.

Rhai o'r uchafbwyntiau ar gyfer y chwe mis nesaf

Rydym yn parhau i ddatblygu'r gwaith rydym wedi'i ddechrau eisoes ar y Rhaglen Drawsnewid, fel yr amlinellir uchod.

Cerrig Milltir ein Rhaglen Drawsnewid



Bydd llais y plentyn yn parhau i fod yn ganolog i bopeth rydym yn ei wneud, a byddwn yn adeiladu ar yr **Uwchgynhadledd gyntaf i Bobl sy'n Gadael Gofal** trwy weithio gyda Voices from Care i gynnal uwchgynhadledd ranbarthol yn y Gogledd ym mis Hydref ar gyfer pobl sy'n gadael gofal.

Yn ystod gweddill y flwyddyn hon, byddwn ni'n canolbwyntio'n benodol ar gyhoeddi a rhannu'r Siarter Rhianta Corfforaethol sy'n allweddol i gyflwyno Datganiad yr Uwchgynhadledd i Bobl sy'n Gadael Gofal.

Byddwn yn parhau i weithio gyda'r Grŵp Gweithredu Rhianta Corfforaethol er mwyn ystyried camau ar gyfer Rhianta Corfforaethol yn y dyfodol, gan gynnwys datblygu canllawiau i gefnogi camau gweithredu a phennod benodol ar Rhianta Corfforaethol i gefnogi awdurdodau lleol yn eu rôl fel rhieni corfforaethol yn Rhan 6 o'r Cod Ymarfer yn ymwneud â phlant sy'n derbyn gofal a phlant sy'n cael eu lletya. Bydd ymgynghoriad ar y bennod a'r canllawiau drafft yn cael ei gynnal y gaeaf hwn.

Ar gyfer y Fframwaith Ymarfer Cenedlaethol, bydd gwaith yn cael ei wneud i ehangu'r broses ymgynghori, gan ddefnyddio'r safonau cenedlaethol drafft fel sylfaen i fod yn hyderus bod fersiwn derfynol y Fframwaith Ymarfer yn mynd i wneud gwahaniaeth i fywydau plant dros amser. Byddwn yn gweithio gydag ymarferwyr ledled Cymru i sicrhau bod y fframwaith ymarfer yn cael ei roi ar waith a'i fod yn ateb anghenion plant.

Rydym yn parhau i fuddsoddi yn **Maethu Cymru** gan ddefnyddio ein buddsoddiad i sicrhau ein bod yn gallu recriwtio teuluoedd maeth sy'n diwallu anghenion amrywiol y plant sydd angen gofal a chymorth. Byddwn yn parhau i ddarparu cynnig craidd cyson o gymorth i deuluoedd maeth ledled Cymru er mwyn sicrhau bod ein teuluoedd maeth yn gallu derbyn cymorth ar sail angen pryd bynnag y maent ei angen a ble bynnag y maent wedi'u lleoli yng Nghymru.

Mae **Ymrwymiad Cenedlaethol Maethu Cymru wedi'i lansio** ac mae'n cynnig pecyn hyfforddiant, cymorth a gwobrau sydd ar gael yn gyson i holl ofalwyr maeth awdurdodau lleol Cymru. Mae gwaith yn parhau gydag awdurdodau lleol yng Nghymru er mwyn helpu i gyflwyno'r elfennau gwahanol a amlinellir yn yr ymrwymiad. Mae gwaith yn mynd rhagddo ar y model ariannol yn ymwneud â'r Isafswm Lwfans Cenedlaethol a chyfres newydd o drefniadau talu wedi'u cysoni.

**Mae rhagor o wybodaeth ar gael yma:
plantsynderbyngofal@llyw.cymru
lookedafterchildren@gov.wales**

Taflen ffeithiau: Cynllun Grant i'r Trydydd Sector ar gyfer Gwasanaethau Cymdeithasol Cynaliadwy

Dyma rai o'r prosiectau rydym ni'n eu hariannu drwy ein Cynllun Grant i'r Trydydd Sector ar gyfer Gwasanaethau Cymdeithasol Cynaliadwy:



Ar Trac - Cymorth i Ferched Cymru

Mae'r prosiect Ar Trac yn cefnogi plant a phobl ifanc sydd wedi profi neu wedi gweld cam-drin domestig ac sy'n cael anawsterau gyda'u perthnasau teuluol a gyda chyfoedion. Trwy fynd i'r afael â'r anawsterau hyn a datblygu cryfderau yn ystod plentyndod, nod Ar Trac yw lleihau effaith profiadau niweidiol yn ystod plentyndod sy'n gysylltiedig â cham-drin domestig, a gwella llesiant corfforol a meddyliol yn ddiweddarach mewn bywyd.

Rhaglen Eiriolaeth Rhieni - Gwasanaeth Eiriolaeth Ieuenctid Cenedlaethol

Nod y prosiect yw cefnogi cynlluniau Llywodraeth Cymru i ddarparu cymorth ar gyfer ymyriadau teuluol gyda'r nod o leihau nifer y plant sy'n cael eu derbyn i'r system ofal yng Nghymru. Prif nod y prosiect yw cyflwyno ymyriadau ataliol a sicrhau bod hawliau'r plentyn yn cael eu cynnal yn llawn.

Prosiect Undod - Gwasanaeth Eiriolaeth Ieuenctid Cenedlaethol

Mae Prosiect Undod yn cynnig cymorth i fenywod ifanc beichiog a mamau ifanc hyd at 25 oed â phrofiad o fod mewn gofal ledled Cymru. Mae'n darparu cymorth emosiynol ac ymarferol un-i-un gyda'r nod o gadw teuluoedd gyda'i gilydd, lle bynnag y bo modd.

Skills PLUS (Skills +) - Gweithredu dros Blant

Mae Skills+ yn wasanaeth ar gyfer Pobl Ifanc 14-24 oed â Phrofiad o fod mewn Gofal. Mae'r prosiect yn darparu Llwybrau pwrpasol sy'n helpu pobl ifanc â phrofiad o fod mewn gofal i bontio i fyd oedolion, trwy ddefnyddio ymyriadau cysylltiedig amrywiol sydd â'r nod penodol o leihau eu gwendidau er mwyn sicrhau bod ganddynt y cadernid, y sgiliau,

<p>Mae'r prosiect hwn yn darparu cymorth cofleidiol dwys i famau â phrofiad o fod mewn gofal ac mae'n helpu i ddatblygu rhwydweithiau cefnogaeth gan gymheiriaid ar eu cyfer. Nod y prosiect yw helpu i dorri'r cylch lle mae plant y mamau hyn sydd â phrofiad o fod mewn gofal yn cael eu derbyn i ofal eu hunain, a helpu i sicrhau nad ydynt yn destun prosesau amddiffyn plant maes o law.</p>	<p>a'r adnoddau i'w helpu i ymdopi'n gadarnhaol â heriau byw'n annibynnol.</p>
<p>Cynorthwyo Plant a Phobl Ifanc Du, Asiaidd ac ethnig leiafrifol yng Nghymru – EYST</p> <p>Mae'r gwasanaethau yn wasanaeth atgyfeirio ar gyfer Plant a Phobl Ifanc Du, Asiaidd ac ethnig leiafrifol 0-25 oed sydd ag anghenion cymorth 'ychwanegol' neu 'luosog'. Nod y gwasanaeth yw gwella canlyniadau llesiant Plant a Phobl Ifanc Du, Asiaidd ac ethnig leiafrifol sydd ag anghenion gofal cymdeithasol, trwy wasanaeth cymorth sy'n ystyriol o hil, ffydd a diwylliant, sy'n canolbwyntio ar yr unigolyn ac sy'n seiliedig ar hawliau, gan ddatblygu a chysylltu â gwaith EYST gyda phlant a phobl ifanc Du, Asiaidd ac ethnig leiafrifol yn Abertawe.</p>	<p>Cefnogi Pobl Ifanc yng Nghastell-nedd Port Talbot ac Abertawe - Plattform</p> <p>Mae Prosiect Pobl Ifanc Plattform yn darparu lle diogel fel bod pobl ifanc 13-16 oed yn gallu oedi, anadlu a chysylltu. Trwy ddarparu rhaglen lesiant, cefnogaeth gan gymheiriaid a chymorth un-i-un, bydd pobl ifanc yn cael y cyfle i archwilio beth mae iechyd meddwl a llesiant yn ei olygu iddyn nhw. Byddant yn cael cyfle i gyfarfod ag eraill sy'n wynebu heriau tebyg, rhannu straeon am adferiad a strategaethau bob dydd ar gyfer llesiant. Mae'r prosiect yn rhoi cyfle i bobl ifanc hyfforddi i fod yn fentoriaid cymheiriaid, a bydd yn rhoi plattform i bobl ifanc lunio cyfeiriad y prosiect.</p>
<p>Rhwydwaith Maethu Cymru</p> <p>Nod y Rhwydwaith Maethu yw cyflwyno rhaglen waith a fydd yn grymuso'r gymuned faethu i wella canlyniadau llesiant ar gyfer plant a phobl ifanc sy'n derbyn gofal o fewn y fframwaith llesiant cenedlaethol. Maent yn cynnwys:</p> <ul style="list-style-type: none"> • Cynnal 'Llinell Faethu Cymru', sef gwasanaeth gwybodaeth a chyngor o ansawdd uchel sy'n cynnig cymorth dros y ffôn ac adnoddau digidol, pecynnau cymorth a gweminarau hygyrch; • Cynnig Datblygiad Proffesiynol ar gyfer y gweithlu maethu trwy gynnal digwyddiadau a gweminarau sydd ar gael ledled Cymru; • Darparu cyngor a chyfryngu annibynnol i bob gofalwr maeth a staff gwasanaethau er mwyn helpu i ddatrys gwrthdaro, cwynion neu honiadau; • Cefnogi ymarfer da er mwyn lleihau ac atal digwyddiadau sy'n gallu arwain at fethiant lleoliad a dadgofrestru. 	

Taflen ffeithiau: Rhaglen Trawsnewid ar gyfer Gwasanaethau Plant - Taflen Ffeithiau Allweddol

Defnyddiwyd cyfanswm o £3.5m o gyllid Llety Rhanbarthol gan 15 prosiect ym mhob rhanbarth o Gymru gan arwain at y canlynol:

- Creu 26 o welyau newydd o ddarpariaeth ranbarthol ar gyfer plant ag anghenion cymhleth
- Darparu cymorth i 62 o blant a phobl ifanc ag anghenion cymhleth

Yn 2022/23, neilltuodd Byrddau Partneriaeth Rhanbarthol oddeutu £50m o gyllid Llywodraeth Cymru drwy'r Gronfa Integreiddio Rhanbarthol i fuddsoddi mewn 86 o brosiectau ledled Cymru.

Rydym yn buddsoddi £1.6 miliwn o gyllid yn ystod tymor y Senedd hon trwy'r Gronfa Newid Plant â Phrofiad o fod mewn Gofal, er mwyn cynyddu'r gwasanaethau eiriolaeth i rieni sy'n bodoli eisoes ledled Cymru.

Rydym wedi buddsoddi £68m yn ychwanegol yn y sector dros dair blynedd er mwyn cefnogi a sbarduno ein gweledigaeth i ddileu elw preifat o ofal plant sy'n derbyn gofal.

Ers 2017, rydym wedi darparu £1m bob blwyddyn ar gyfer cronfa Dydd Gŵyl Dewi sy'n darparu arian yn uniongyrchol i bobl ifanc sydd â phrofiad o fod mewn gofal i'w helpu i fanteisio ar gyfleoedd a fydd yn gymorth iddynt ddechrau byw yn annibynnol.

Cymerodd dros 40 o blant â phrofiad o fod mewn gofal ran yn yr Uwchgynhadledd gyntaf i Bobl sy'n Gadael Gofal a gynhaliwyd ar 3 Rhagfyr 2022. Hwn oedd y digwyddiad cyntaf o'i fath yng Nghymru.

Mae Llywodraeth Cymru wedi ymuno â Chynllun Interniaeth Pobl sy'n Gadael Gofal y Gwasanaeth Sifil ar gyfer 2023 ac mae'n cynnig tair rôl yn y rownd recriwtio ddiweddaraf.